

## PN husu reforsa kapasidade jestaun interna no transparánsia ezejuta OJE 2022



Debate no votasaun Orsamentu Jeral Estadu 2022 iha sala plenária Parlamentu Nasionál, kuarta (15/12/2021). Imajen TATOLI/António Gonçalves

**DILI, 16 dezembru 2021 (TATOLI)**—Prezidente Parlamentu Nasionál, Deputadu Aniceto Longuinhos Guterres Lopes, husu Governu reforsa kapasidade jestaun interna no transparánsia ba entidade sira atu ezejuta Orsamentu Jerál Estadu (OJE) 2022 ho montante billaun \$2.

Prezidente Parlamentu Nasionál ne'e hato'o parabens ba oitavu Governu konstituisional lideradu Primeiru-Ministru, Taur Matan Ruak, akompaña membru Governu no deputadu sira ho mós parte relevante sira kumpre ona dever konstitusional ba povu no Estadu Timor-Leste tanba OJE 2022 aprova ona iha final Global ho montante billaun \$2 atu bele asegura governasaun no dinamiza TL nia dezvoltamentu.

“Ita hala'o implementasaun OJE bazeia ba programa tinan daruak ne'ebe presiza reforsa tan ho kapasidade jestaun interna no transparánsia ho responsabilidade,” Deputadu Aniceto Longuinhos Guterres Lopes hateten hafoin aprova proposta lei OJE 2022 iha final global, iha plenária Parlamentu Nasionál, kinta ne'e.

Konsiente preokupasaun ho sustentabilidade fundu petrolíferu tanba fonte ekonómiku seguru seluk seidauk kobre reseita naun petrolíferu no mós asegura estabilidade ekonomia iha TimorLeste nian seidauk dezvoltave didi'ak.

Nia hato'o observasaun ikus iha debate OJE 2022 koloka situsaun lubuk ne'ebé presiza parte hotu tau atensaun sériu, tanba iha tinan rua hirak ne'e ho restrisaun ne'ebé Estadu impoin ho situsaun COVID-19 kauza saúde pública ne'ebé no agora mosu tan variante foun Omicron ne'ebé agora espalla ona iha mundu.

Aleinde hasoru situasaun alterasaun klimatika no dezastre natural sai preokupasaun sériu liután iha âmbito dezvoltamentu nasional, nune'e OJE 2022 prevee ona prioridade sira hodi rekupera ekonomia no luta kontra COVID-19.

Vise Prezidente Bankada FRETILIN, Deputadu Antonino Bianco, hateten liu tiha diskusaun ida produtivu ho kritiku iha durante loraun neen ho votasaun no aprovasaun, ho maioria kualifikada ba final global ba OJE 2022 ho reseita global konsolidada \$2.106.860.231 no ba administrasaun sentral ho montante \$1,859,477.947.

Bankada Fretilin elojia atusaun otivadu Governu Konstitusional ho baze ba iha prinsipiu transparensia, respeito ba lei, responsabilidade no partisipasaun, nu'udar indikador fundamental hosi boa-governasaun, hodi fó importánsia liu ba qualidade no rezultadu duké haree ba ezejutaun orsamentu.

“Orsamentu Jerál Estadu ba tinan 2022 la’ós atu rezolve buat hotu-hotu, maibé bele rezolve buat balun tuir nesesidade no kapasidade ne’ebé iha aumentu alokasaun orsamentál ba infraestrutura bázika, infraestrutura sosiál no infraestrutura ekonómika, nebé refleto ba polítika ema mak sai sentru ba dezvoltamentu,” nia hateten.

Bancada Fretilin husu Primeiru-Ministru, Taur Matan Ruak, no membru Governu atu konsolida no hadia di’ak liután liña koordinasaun inter-ministeriál no entre instituísiaun sira, hodi bele implementa OJE 2022 ho efisiénsia no efikásia, hadi’a qualidade no prestasaun servisu, hadi’a qualidade projetu, tuir prinsípiu boa-governasaun.

Bankada CNRT, representa Deputada Patrocinio Fernandes hato’o observasaun lala’ok debate OJE 2022 iha kontestu kapasidade meza parlamentu hasoru deputadu CNRT.

Bankada CNRT lamenta maneira jere meza plenária la harea proporsionalidade hodi fó hanoin crítica ba proposta OJE laiha ona respeitu direitu bankada simu informasaun kona-ba asuntu interrese nasional hosi artigu 70 konstituisaun RDTL.

Nia kestiona, Governu laiha kbiit tanba aprova ona tetu OJE iha Konsellu Ministru maibé mai iha Parlamentu Nasionál bankada Governu halo proposta hodi hasa’e tetu OJE 2022 mezmú Governu laiha esplikasaun klaru.

“Mezmu Primeiru-Ministru mai afirma orsamentu pur programa maibé realidade bankada Governu hato’o proposta sobu tiha orsamentu, nune’e la prudente kontra nia polítika atu evita foti osan barak liu labele foti liu rendimentu sustentavel,” nia kestiona.

Bankada CNRT preokupa kapasidade réal OJE 2021 to’o iha fin ezekeusaun 59% maibé husu osan boot. “Ho razaun sira-ne’e hotu mak bankada CNRT vota kontra OJE 2022,” nia dehan.

Reprezentante Bankada PD, Deputadu Mariano Assanami Sabino, afirma PD fó apoiu ba orsamentu tanba ho prinsípiu katak orsamentu mak raan ba Estadu no povu prezisa.

PD laiha kompromisu ho Governu ne’ebé de’it mak ukun mezmú sai opozisaun maibé kompromisu ba povu tanba ho situsaun COVID-19 no impase polítika liubá oinsá atu rekupera hikas ekonómia, nune’e orsamentu ne’e prezisa tebes ne’ebé prevee ona atu halo uma ba povu, hasa’e subídiu líder komunitáriu no idozu aumenta no hatán mós ba nesesidade bázika sira seluk hanesan bee-omoos, eletrisidade tanba ne’e husu ezekeuta orsamentu ho dixiplina.

Bankada PLP, Francisco de Vasconcelos, hateten ohin termina debate liuhosi aprovasaun final global ho OJE 2022 montante boot lori bankada PLP nia naran hakarak apresia no kontgratula ba esforsu tomak hosi oitavu Governu Konstituisional no Parlamentu Nasionál hodi toma desizaun importante ida-ne’e ba vida Estadu nian.

“Ita hakarak iha 2022 hanesan tinan rezisténsia no rezilénsia ba povu, tanba ne’e mak iha 2020 Governu avansa kedas ho estabilizasaun ekonómika ne’ebé ambisiozu define pakote estimula ekonómia kompostu hosi medida konkretu hamutuk 11 ho hanoin atu hamenus efeitu oiain ne’ebé mosu iha ita-nia rain,” nia hateten.

Deputadu KHUNTO, Luis Roberto, hateten KHUNTO mai ho prinsípiu katak ‘mai tane ó rai no o lisan’ nune’e hakarak husu no iha esperansa Primeiru Ministru no membru Governu sira atu ezekeuta osan ho montante ne’ebé boot hodi dezvoltave nasaun.

“Osan mak halo dezvoltamentu no rekupera ekonómia. Husu ba entidade soberania haat atu kontrola orsamentu ne’ebé aprova ona iha implementasaun,” nia dehan.

Xefe Bankada PUDD, António de Sá Benevides, hateten PUDD vota a-favór ba orsamentu ne’e tanba povu prezisa maibé orsamentu ida-ne’e la hanesan anteriór tanba deputadu sira barak hato’o proposta hodi aumenta osan boot no Governu mak implementa prezisa ho didi’ak.

Xefe Bankada Frente-Mudança, Isabel Freitas Ximenes, fó votu a-favór ba OJE 2022 nune’e bele benefisia povu kbiit laek hodi mellora setór saúde, edukasaun no problema bázika sira seluk ho qualidade.

Xefe Bankada UDT, Francisco David Xavier Carlos, observa katak durante diskusaun OJE 2022 mezmú iha tinan 20 ona, deputadu barak ne’ebé hanesan konsidera veteranu no polítiku katak realmente seidauk iha identidade kolektivu ida ho poder Estadu, nune’e prezisa buka solusaun hamutuk hodi lori dezvoltamentu ba povu.

**Jornalista : Nelson de Sousa    Editor        : Cancio Ximenes**